

ius est obvium ; hominem ex ipso cœlo occulta quadã ratione plus vivere & nutriri, quàm vel aere, vel aqua, ullivè alijs his inferioribus ac elementaribus rebus, & incredibilem cum cognatis astris obtinere familiaritatem, ut non immeritò animas nostras partē esse ipsius cœli, veteres Philosophi dixerint. Tota insuper humani corporis structura ita est proprietatibus septem errantium stellarum analoga, ut similes ferè operationes hæc in corpore nostro cum Planetarum in cœlis natura sortiatur. Sic cor in humano corpore vitalium spirituum auctor, Soli cœlesti, à quo mundo vivificus procedit calor, æquiparatur. Sic cerebrum in homine Lunæ cœlesti assimilatur, & ad ipsius crescentiam & decreascentiam etiam augetur & diminitur, humidamque Lunæ naturam æmulatur. Quemadmodum vero cor & cerebrum duo maxima in corpore nostro sunt membra : Sic etiam Sol & Luna, quibus hæc sunt analoga, maximè principalia sunt in cœlo luminaria. Et veluti inter cor & cerebrum maxima intercedit familiaritas ; sic etiam inter Solem & Lunam in ipso cœlo multiplex cernitur combinatio : Adeò ut Luna non nisi à Sole suum sortiatur lumen ; & ejus motus ad Solis cursum adeò sit alligatus, ut circulorum suorum revolutiones respectu metæ Solaris cursus perpetuo absolvat. Post hæc duo principalia in corpore nostro membra, alia duo minus quidem principalia, sed admodum utilia existunt, Jecur videlicet & Renes, quæ duobus beneficis & utilibus, non tamen ita ut Sol & Luna, principalibus Planetis, assimilantur. Epar quidem, quod officina est sanguinis, in quo cum vita consistat, sanguineo & vitali Planetæ, Jovi est simillimum. Renes autem, qui generationi deputatis membris vires largiuntur, Veneri prolifico Planetæ, & generationum Matri æquiparantur. Duo insuper alia corporis nostri, non solum respectu cordis & cerebri, minus principalia, sed etiam, quoad cetera viliori-

4.
Analogia
septē prin-
cipalium
membrorū
corporis
humani
cum septē
Planetis.
Cor. ☉
Cerebrū ☾

Epar. ♃

Renes. ♀